




ILLUSTRISSIMO AC CELSISSIMO DOMINO
 ANNÆ-LUDOVICO-ALEXANDRO DE MONTMORENCY
 PRINCIPE A ROBE C Q,
 UNI PROCERUM E PRIMA CLASSE MAJORATUS HISPANI,
 PRIMO GALLIÆ CHRISTIANO BARONI,
 COMITI A BUCHOVEN ET SACRI IMPERII ROMANI,
 CASTRORUM ET REGIORUM EXERCITUUM PRÆFECTO,
 URBIS BUCCINII IN HANNONIA GUBERNATORI

Hæc Theses in perpetuum reverentiæ & obsequii monumentum dicat, vover, consecrat humillimus &
 obsequentiſſimus ſervus GUILLELMUS-PETRUS FRIGARD, Chirurgiæ Candidatus.



THE UNIVERSITY OF CHICAGO
LIBRARY
1892
CHICAGO, ILL.
U.S. DEPT. OF AGRICULTURE
BUREAU OF PLANT INDUSTRY
WASHINGTON, D.C.



T H E S E S

ANATOMICÆ ET CHIRURGICÆ.

QUANTASCUMQUE vires, ut sua perficiat, aut perfecta tueatur opera, adhibeat Natura vigil, extraneam tamen mutuari opem nimum sæpè cogitur. Ubinàm enim molimen majus, quonam in casu sapientiam magis absconditam & spectatiorem edit, quàm Hominem luci commissura? Quantà arte per longum temporis intervallum omnia disponit! Quàm simplex in specie! Sed quàm compositus ad id apparatus! Sagacitate tam eximiâ tutum & constans ad vitam homini parari iter, paratumque confirmari videtur. Felices equidem plurimi, quasi uno passu, illud spontè peragunt; quidam è contrà vix illud subeunt, cum naturæ impensas minimè agnoscentes, ab arte solâ, (quidquid & ipsis, quidquid & parturienti immineat periculi) pertinaciter pulsantes, exitum quærunt. Tunc audit Chirurgia, jam adest, res in ordinem redigere conatur; Anatome fulta, Physice irradiata, Mechanicis instructa, nihil omittit ut naturam succumbentem sublevare queat. Artem salutiferam sic elaborantem passim & ubiquè sequi, opus perutile & humanitatis dignissimum, laboris tamen diuturnioris quàm ut intra disputationis veluti momentaneæ angustos limites adimpleri queat; nobis ergo liceat unicam tantummodò feligere ansam, Uteri nempe Obliquitatem.

NIHIL aliud est uterus quam hospitium in gremio matris, cui libet humani generis individuo assignatum, & ab eodem per no-

vem menses juxta leges phycas occupandum. Ita sese habet ipsius structura ut ampliari præsentiâ corporis illud subeuntis, & angustari propriâ virtute queat. Fibræ carneæ, membranosæ, vasa sanguifera, lymphatica, & nervi, ipsius substantiam componunt, & ita inter se intricantur, ut corpus spongiosum mirèque elasticum efforment. Pars hujus superior est inferiore latior, anterior & posterior sunt leviter planæ, latera curvilinea; undè figura ipsi accedit piri depressi & inversi. Quæ dimensiones eò inserviunt ut in non gravidis minorem locum obtineat uterus, & in prægnantibus molem in majorem ellipsoideam quæ faciliùs assurgere possit. Pendulum & vix fulcitum diceret illud organum, sed omnes abdominis partes ita comparatæ videntur ut illud sustinere & ipsi cedere pro re natâ debeant. Ossâ, cartilaginea, ligamenta, viscera, membranæ, muscoli, & tegumenta communia ad id concurrunt. Duo nimirum ossâ lata, (innominata audiunt) cum altero (sacrum ipsi nomen) cartilaginibus accuratè conjuncta, quamdam pelvis speciem constituunt; cujus pars superior est amplior, inferior verò in angustiore desinit; linea circularis prominens majorem à minori separat. Innominata tribus partibus componuntur, quarum postica & latior dicitur ilium, anterior pubis, & infima ischium; sacrum retrò ponitur, apice inferiori & incurvo donatur, qui coccyx nuncupatur, & pelvim inferiorem situ proprio coarctat. Utriusque pelvis diameter major ab ilio ad aliud, idest, ab uno latere corporis ad alterum dirigitur. In medio fundi hujusce circumvallationis, vesicam inter & intestinum crassius, seu rectum, ita stat uterus ut ipsius latera majori in diametro reperiantur. A singulis lateribus pelvis ad unumquemque uteri limbum appellit expansio membranacea, duplex, lata & paululùm tensa, quæ totum hujus visceris corpus involvit & sustinet, ligamentorum latorum nomine cognoscitur; peritonæum illam suppeditat. Inter horum ligamentorum duplicaturam continentur duo corpora ovata, cellulosa, canalesque duo musculosi; illa tanquam ovaria, seu ovorum receptacula, utero semper ministratura, considerantur; isti verò tanquam ovorum sæcundatorum ad cavum in utero positum fidi ductores habentur. Paulò infrâ, & à lateribus uteri, duo funiculi teretes, subalbidi, folliculosi & vasculares, protenduntur usque ad inguina, ibique, annulos inguinales prætergressi, desinunt in filamenta gracilia, quæ adipe & cute obvoluta mox evanescent; molem uterinam in medio pelvis continere, illamque sustinere vulgò creduntur; indè ligamenta, & à figurâ, rotunda

5
nuncupantur; talem verò facultatem vix in ipsis adesse animad-
vertet quicumque illorum structuram mollem & extensilem, nec-
non situm quem obtinent infra partem uteri majorem & gra-
viorē, præsertim in prægnantibus, considerabit. Nonne potius
expansioni membranaceæ ligamentorum latorum robur adderent,
fibris ipsis, quibus involvuntur, punctum adhærentiæ concili-
liando inter dua illarum altera adhæisionis puncta? Præter mo-
dò descriptos uteri connexus, partem uteri inferiorem, quam
collum dicimus, circumplectitur & retinet ductus quidam, seu va-
gina musculosa & membranacea, quæ ad exteriora ducit. Pars
superior, quæ vocatur fundus, est libera. Textus cellularis, ad-
modum laxus, facies anteriorem & posteriorem cum vesicâ & rec-
to alligat. Intestina gracilia fundo superfedent, sed licet præ-
tent volumen maximè notandum, uterum leviter tantummodò
premunt; tum quia retinentur ope mesenterii, tum quia fluctuant
hinc & indè, & sese circa uterum ordinatim disponunt, illum-
que sustinere amant, præcipuè per graviditatem. Frustrà ab he-
patis & lienis pressione aliquid timeres; vel à primâ genesi vin-
cula acceperunt. Incastrum stomachi, aut intestinorum turgescen-
tiæ, musculorum abdominis, & diaphragmatis contractioni,
dimotionis cujuscunque causam tribueres; nedùm perturbent si-
tum naturalem, è contrâ ipsi favent, quia scilicet ab illorum ac-
tione debitâ pendet æquilibrium inter partes contentas servan-
dum.

Ex hætenus enumeratis & observatis liquet uterum ampliari
non posse partem versùs superiorem sicut & superiorem; tum
propter resistantiam circumvallationis ossæ, tum propter ipsius-
met structuram arctiorem, & compressam præsentia recti & vesicæ
ferè semper turgidorum; super est ergo ut dilatetur versùs
partem superiorem, tum propter pelvis amplitudinem majorem,
tum propter ipsiusmet fundum latiore, & præsertim habitâ ra-
tione minoris resistantiæ partium superfedentium.

QUA proportionē increfcit fœtus in cavo uteri, eâdem augefcit,
ponderat, & protuberat moles uterina; in hoc consistit
graviditatis status. Fœtus & partes ab ipso pendentes ita dis-
ponuntur, ut non magis ex unâ quàm ex alterâ regione pon-
derent. Aliundè, partes ambientes non magis premunt quàm ante
statum prægnationis; intestina fursùm & à lateribus secedunt,
peritonæum, muscoli abdominales & tegumenta communia, il-
larum levi & ferè insensibili pulsu mollescere & extendi videntur
pro ut sese extollit uterus; indè fit ut juxta axem pelvis, seu

lineam ad perpendicularem magis ac magis accedentem, procedat ipsius incrementum ex lege naturali, quousque pelvim majorem occupet. Quocumque modo deficeret æquilibrium ex aliquâ parte modò dictâ, tunc increfcens volumen uterinum ab axe pelyis gradatim recederet, & in ultimo graviditatis gradu adesset obliquus uteri situs, qui partui valdè noceret, idest, morbus de quo nunc differere est.

CORPUS quodlibet axi subjectum ab eodem quatuor modis præcipuis recedere potest. Uterum pariter quadruplici modo deviare posse concipitur, scilicet, partem versùs abdominis anterioris, vel posteriorem, aut alter-utrumque latus. Inter hæc deviationes, aliæ distingui possent mediæ pro ut à præcipuis plus minùsve recedunt; sed cum mediarum Therapeia ad præcipuarum, ad quas magis accedunt, reducat curacionem, de præcipuis duntaxat agemus.

QUIDQUID validius ex unâ parte quàm ex alterâ premet aut attrahet uterum, inclinationis ipsius erit causa genuina; hinc actio inæqualis musculorum abdominalium, nixus, lapsus, decubitus frequentes & soliti in uno potius quàm in altero latere, protuberantia major vesicæ aut recti, horum deviatio ad aliam potius quàm ad alteram pelvis regionem, schirri, hydropes, sive ovariorum, sive aliarum abdominis partium, prava ossium pelvis conformatio, pondus inæquale uteri sive propter ipsiusmet volumen magis auctum in hoc latere quàm in opposito, sive propter adhærentiam inferiorem & nimis lateralem placentæ, aut hujus nimium pondus in cavo uteri, inter causas sitûs obliqui uterinæ molis annumerari debent. Fœtus prava quæcumque positio, dum non effluerunt aquæ, obliquitatis uterinæ nullatenus esse potest causa, quandoquidem in fluido natans semper requirit æquilibrium; experientia nihilominus probat ejusmodi positionem junctam uterinæ obliquitati non lève nocumentum asferre in partu post undarum effluxum, maximamque asferre complicationem.

IN obliquitate anteriori, fundus uteri ossibus pubis innititur, cervix verò ad sacrum propius accedit, quinetiam aliquandò ita sursùm retrahitur ipsius orificium, ut usque ad ultimas vertebrae lumbares admoveatur. Ventrem in hocce casu valdè prominere, latera verò quasi deprimi, & quamdam globuli speciem supra pubem apparere necesse sequitur; abdomen sic prominens vulgò dicitur venter propendulus, cujus varii sunt gradus pro variâ propensione; aliquandò enim usque ad genua

extenditur. Notandum interea deviationem anteriorem existere posse absque ventre propendulo, si deviatio sit minor, aut uteri volumen minus. In deviatione anteriore, orificium uteri difficile, & in majori ipsius gradu nullatenus tangi potest; digitus introduci nequit nisi inflectatur; aquæ sese produnt sub volumine plano & compresso, propter orificii coarctationem; dolores magis ac magis urgent, nec tamen partus advenit, quia pressiones non directe agunt in orificium, sed partem versus posteriorem uteri; vires tandem exhauriuntur, & foetus matrisque simul oriretur interitus, ni celer afferretur auxilium. Jam ergo absque mora, viribus provide, situm concilia idoneum parturienti, ita resupinetur ut pelvis excelsior sit capite, orificii interni labrum extremo indice arripere & ad partem inferiorem anterioremque, quantum poteris, adducere coneris; forsitan tali encheiresi, necnon proprio pondere, in parvam pelvim caput foetus decider. Uteri orificium non relinquendum, mulier paulatim ad planum inclinatum admovenda ut facilius tolerentur dolores, exitusque foetus sit magis in proclivi; si tamen adhæreret caput ossi sacro, situs alter tentandus esset; femora duntaxat inniterentur angulis duarum sedium, ita ut inter utraque adesset spatium quam posset maximum, & caput pectusque simul valde inclinarentur; aut etiam genubus & cubitis incumberet parturiens. Si tandem invitâ sitûs mutatione non progreditur partus, pedes arripere & foetum extrahere est.

OBLIQUITAS posterior est cæteris minus communis, propter vertebrarum lumbarium & sacri protuberantiam. Abdomen deprimitur in parte anteriori & mediâ, in lateralibus verò prominet; prægnantes conqueruntur se foetum moventem non sentire, aut illum versus tergum pectusve solum moveri; dolores sunt admodum vividi & partibus præcordialibus correspondent; os tinctæ figuram crescentis exhibet, ossibus pubis admotum reperitur, & vix tangi potest; foetus caput contra hæc ossa pellitur & ita premitur ut exinde sequi possit ipsius contritus. Parturientis & prolis periculum in mora, ni brevi succurrat ars. Nunc prægnans resupinanda ita ut pars inferior trunci sit capite paulò elatior, vesicæ evacuatio provocanda, deinde orificium uteri adducendum, & alterâ manu pars pubis superior leviter premenda, ut dimoveri possit caput foetus; quod si parvam pelvim ingreditur, partus secundum morem solitum perficiendus.

LATERALIS obliquitas suam secum fert definitionem, & potest existere vel à dextrâ, vel à sinistrâ. Abdominis in uno po-

tiusquàm in altero latere prominentia, motuum foetus in latere protuberanti perceptio, eorumdem absentia in opposito, difficilis exploratio orificii interni, hujus positio prope lineam circumlarem pelvis, fundi uterini situs in regione opposita, undarum procidentia difficilis, illam designant. Sæpè sæpius etiam obliquè sese offert foetus, aurem, scapulam, brachium exhibet, undæ paulatim effluunt, nec sese antea obtulerant. Ejusmodi obliquitati mederi potes, si parturiente in latere obliquitati opposito decumbente, femoribus sese decussantibus, os tincæ apprehendas, illud ad statum naturalem revoces, & alterâ manu partem lateralem abdominis protuberantem repellas; tunc facilius quàm in aliis obliquitatibus perficitur partus.

QUIDQUID à mediis jam propositis expectandum veniat, eo tamen pervenire possunt obliquitates ut irrita evadant, nec adhuc spes omnis abjicienda. Forceps admoveatur; si non succedat, sedulo perpendendum an vitæ signa in foetu deficient, necne. In primo casu, caput ipsius comminuerè quoadusquè foras adduci queat; in altero, operationem quæ vel ab utero vitam servavit heroibus non-nullis, interquos vulgò annumeratus fuit Julius-Cæsar Imperator, celebrare non dubitandum.

Verneux Has Theses, DEO JUVANTE, & Præsidente M STEPHANO-PETRO LELAUMIER, Artium & Chirurgiæ Magistro, tueri conabitur GUILLEMUS-PETRUS FRIGARD, Ebroidensis, in alma Universitate Parisiensi Artium liberalium Magister.

P A R I S I I S.

IN REGIIS CHIRURGORUM SCHOLIS,

Die Sabbati 16^a. Octobris, à sesqui secundâ post meridiem ad septimam, anno R. S. H. 1762.

PRO ACTU PUBLICO

ET

MAGITERII LAUREA.

Typis P. AL. LE PRIEUR, Regii Chirurg. Collegii
Typographi.